

Baez Daih'it Hwnjdaiz

第一次上台

Mboujguenj guh gijmaz saeh, cungj miz baez daih'it, baez daih'it cawj haeux, baez daih'it gag ninz, baez daih'it cuengqhag gag ma ranz…… hawj gou cei q nanzlumz dwg baez daih'it hwnj daiz cujciz. Baez daih'it hwnj daiz cujciz, ndaej hawj gou gvaqlaeng saenqsim cibcuk, miz mbei bae guh gij saeh gou nyinhnaeuz guh mbouj daengz haenx.

Baez haenx, hagdangz gawjbanh yizsiz sausenhduiyenz moq gyahaeuz sausenhui, lauxsae ra daengz gou, hawj gou cujciz aen yizsiz neix. Neix

dwg gou baez daih'it cujciz ha! Gou gawq gikdoengh youh gaenjieng, gikdoengh dwg aenvih gou couh yaek coux daeuj gij ginglig ciuhvunz gou baez daih'it dang bouxcujciz, gaenjieng dwg yousim gou saeklaeuq youq baihnaj gyoengq doengzhag saetnaji baenzlawz guh!

Ginggyaq sam ngoenz sinhoj bae lienh, cungjsuenq daengz ngoenz hwnj daiz lo. Hwnj daiz gaxgonq, aensim gou lumj cang miz duzdouq nei diuqbubbub. Baez ndwn hwnj gwnz daiz, najbyak gou couh iemq ok hanh

daeuj. Lwgda gou mbouj gamj yawj baihnaj, gou lau dwk heujgwnz haeb heujlaj. Gou roengzrengz hawj swheij simdingh roengzdaeuj, youq ndawsim mboujduenh doiq swheij naeuz: "Gaej lau, mwngz itdingh guh ndaej daengz!" Gou baez youh baez gag hawj swheij cengqmbei, doeklaeng gou swnhleih cujciz sat daengx aen yizsiz lo. Roengz daiz le, sim gou cungjsuenq soeng roengzdaeuj lo.

Yienznaeuz baez cujciz neix gou yienhndaej miz di gaenjieng, hoeng cingqdwg aenvih baez daih'it neix, cij



hawj gou youq cieq roengzdaeuj youq moix baez cujciz cungj ndaej mbouj vueng mbouj muengz bae wngqdoi, cij hawj gou doeklaeng ndaej hwnj aen vujdaiz engq hung bae.

(seiq nienzgaep Cangh Bozhanz)



Buenx Daegnuengx Baenzbingh Haenx

陪伴生病的弟弟

Daxmeh caeux couh dapwngq gou, ngoenz cietlwgnyez yaek daiq gou caeuq daegnuengx bae henz haij youz.

Daengz ngoenz cietlwgnyez lo, hoeng daxmeh cix lwnh gou, bae mbouj ndaej henz haij lo, aenvih daegnuengx baenzbingh lo. "Daegnuengx caen dwgcaengz, haet mbouj baenz, haemh mbouj baenz, bienbien seizneix baenzbingh." Gou gig saetmuengh, caen siengj ndaq daegnuengx can he. "Daegnuengx hix mbouj nyienh baenzbingh ha, ngoenzneix dwg cietlwgnyez, de hix siengj angq-angq yangzyangz bae guhcaemz ha. Mwngz dwg dahcej, baenzlawz cij dan siengj daengz swheij bae youz ne?" Daxmeh doiq gou naeuz.

Yawj daegnuengx aenvih fatndat mbouj miz saek di rengz haenx, gou sawqmwh sim'in de lo. Gou doiq daegnuengx naeuz: "Dahcej buenx mwngz guhcaemz ba." Daegnuengx angq dwk riu lo.

Aen cietlwgnyez neix, yienznaeuz gou mbouj ndaej bae henz haij youz, hoeng gou gamjsouh daengz le gij caencingz dijbauj caeuq gij cwzyin guh dahcej haenx.

(ngeih nienzgaep Gyauz Vujyih)

Caengh Duzmeuz

称猫记

Ranz gou ciengx miz duz meuz he. Gou moix ngoenz cuengqhag ma ranz, duzmeuz cungj gyaenz benz hwnj ndang gou caeuq gou guhcaemz. Duzmeuz yied daeuj yied naek lo, gou siengj bang de caenghcaengh miz geijlai gaen.

Gou cuengq duzmeuz hwnj gwnz aencaengh caengh ndangnaek bae, hoeng duzmeuz fwt couh buetdeuz lo. Sawq le geij baez, cungj mbouj caengh ndaej duzmeuz miz geijlai gaen. Daxmeh

itcig youq henz yawj gou caeuq duzmeuz, daxmeh daezsingj gou: "Siengjsiengj gij banhlap wng ba!" Gou umj duzmeuz youq ndaw rungj siengj bae siengj dauq, itmienh lumh duzmeuz itmienh byaij hwnj gwnz caengh bae. Seizde, aencaengh yienh'ok 26 ciengwz, yi, ngoenzlwenz gou ngamq caengh gvaq, dwg 24 ciengwz. "Daxmeh, gou miz banhlap lo!" Gou singhung hemq hwnjdaeuj, "gou caeuq duzmeuz itgungh naek 26 ciengwz, gou

swheij naek 24 ciengwz, yiengh-neix duzmeuz couh dwg naek 2 ciengwz lo!"

Daxmeh yaengx mehfwngz hwnj doiq gou naeuz: "Feihfeih gag siengj ok banlap daeuj, caen coengmingz."

(ngeih nienzgaep Vangz Yujfeih)



Aeu ndaej caenging le, Vugungh ma daengz Vahgojsan gvaq gij saedceij cwxcaih de. Seizgan nanz le, de couh miz di mbwq lo, de couh iek Sahcwngh bae yawj Batgaiq.

Batgaiq yiedcingz cingj song boux de bae bouqlaeuj gwnngaiz. Gwn sat le, fuzvuyenz dawz mbaw dan cienzngaiz 250 maenz he daeuj. Vugungh naeuz: "Batgaiq, vaiq gyau cienz." Mbouj siengj daengz Batgaiq naeuz: "Raeuz lijdwg bingzdan ba." Vugungh riu naeuz: "Mwngz boux vunzhuk neix, mwngz cungj mbouj gaj gij maetmi mwngz bae saek di. Ndei, bingzdan couh bingzdan." Yienghneix, sam vunz gak dawz mbaw cienz 100 maenz he bawj fuzvuyenz.



Batgaiq Cingjhek

八戒请客

Fuzvuyenz cau cienz hawj gyoengqde 5 mbaw 10 maenz. Vugungh dawz ok 20 maenz, guh cienzsinhoj hawj fuzvuyenz. Lw roengz 30 maenz gyoengqde moix vunz aeu 10 maenz.

Batgaiq damz naeuz: "Golingz, mwngz caen daihfueg, aeu gij cienz raeuz baen hawj fuzvuyenz, gij cienz gou ra ndaej mbouj yungzheih bw……"

Vugungh yawjraen Batgaiq gij yiengh mbouj haengjheiq saekdi, couh naeuz: "Gou ok diuz daez he gaujgauj mwngz, danghnaeuz mwngz dap ndaej deng, gou couh aeu 10 maenz cienz gou hawj mwngz." Batgaiq naeuz: "Gauj couh gauj, mienxndaej naeuz gou beg aeu cienz mwngz."

Vugungh naeuz: "Couh aeu raeuz gwn haeux gienh saeh neix guh daez ba. Raeuz sam vunz dawz ok 300 maenz, saedsaeh cau ma 30 maenz, moix vunz aeu 10 maenz. Yienghneix, raeuz moix

vunz ok 90 maenz, gyahwnj hawj 20 maenz cienzsinhoj hawj fuzvuyenz, itgungh dwg $90 \times 3 + 20 = 290$ (maenz). Lij miz 10 maenz bae gizlawz lone?"

Batgaiq naemj bae naemj dauq hix naemj mbouj doeng 10 maenz cienz dauqdaej bae gizlawz, de couh naeuz dwg fuzvuyenz yaem bae lo.

Sahcwngh youq henz goemq bak riu dwk. Batgaiq naeuz: "Raeuz deng vunz ciemq bienz-ngeiz lo, mwngz lij miz sim riu!"

Sahcwngh naeuz: "Golingz daegdaengq ok daez loek daeuj gauj mwngz, hawj mwngz siengj gvaq vang bae. Saedsaeh diuz daez neix gig genjdanh, raeuz sam vunz ok 270 maenz cienz, ndawde 250 maenz dwg cienz ngaiz, fuzvuyenz ndaej 20 maenz."

Batgaiq bek aen' gyaeuj de naeuz: "Hai, aen uk gou couh dwg cienq mbouj gvaq van daeuj……"

(Vangz Gveisangh)